

*Quan' che la ciale — 'e ciente in setembri,
cui che compre blave — sta mal a tornále a vendi
(vuol dire che fa caldo, dunque perfetta matura-
zione e abbondanza di grano).*

*Setembar
o ti splante fur i puinz
o ti suie ance i torinz.*

Vendeme.

A proporzion dei stàbii, puaràz,
jo fasevi chest an vendeme rare :
ma indovinait mo ? Un trop di dindiaz
me l'à mangiade dute quante and are.

P. ZORUTTI.

Lis Striis di Germànie.

Quasi tal miez dal canàl di san Pieri, parsore la
vile di Cercivint, si viôt une montagne verde che i disin
la Tence. Lassù in alt al è un biel pradissit in forme di
ciadin, dulà che l'è vòs che vignissin une volte a balá
lis striis di Germànie.

'E capitavin ogni joibe, la matine a buinore, prime
che sunassin lis ciampanis di san Nicolò di Paluzze.
Vistudis a blanc, cun t' une velete rosse su lis strezzis
biondis ingropadis su la cope come une bròtule di cia-
naipe, sintadis sun t' une file di nuvulutis d' aur e d' arint,
svolavin jù vongolànt di montagne in montagne, sin
dulà che nàs la Bût. Su la boce del gran fontanòn, in
te ploe minudine che, come flor temesade, 'e salte in
àiar pal impeto da l' aghe che ven fur imburide a ròm-
pisi tai crèz, 'e si lavavin la muse e i pidins, e po, cun
chès lor manutis fres' cinis 'e si petenavin la caveade
e la fasevin sù in rizzòz.